

NI EZ NAIZ POLITIKO

–”Ni ez naiz politiko”,
–esan zuen–,
“baina (1) *Egin* politiko da
eta *Deia*”.
“Nik *El Diario Vasco* edo
El Correo erosten dut”,
–esan zuen–.

(Demonio, ez zekien asko
nahiz *El Diario Vasco*
edota nahiz *El Correo*
zein diren politiko!)

“*Egin* eta *Deia* baino
egunkariago
izatez gainera,
politikoago dira
El Correo eta
El Diario Vasco”,
ihardetsi nion nik,
eta haserretu egin zen,
eta *bueno, bueno,*
no hablemos de política,
arramuskatu zidan,
eta isildu egin nintzen.

Egin eta *Deia*
partidista dira,
partidistaegiak;
eta egunkari
dena beharrekoak.
Hala ere, jokatu
euskal gauzaren alde
jokatzen dute biek
funtsean, edo euren
ustetan, behinik behin.

El Diario Vasco-k eta
El Correo-k ostera,
egunkari franko
hornituak izanik,
funtsean ez dute
euskal gauzaren alde
ezer asko jokatzen,
dudarik gabe, beste
kontra aldeko frente
frenteko partidista
besterik ez direlako.

Euskal gauza zein-zer den
esan-esan beharrik
ez dago ostera:
bereaz hustutzera
dakarten Herri baten
arduraz gainera,
problema horren aurreko
jarrera-modua da,
gutxi gorabehera.